

Iluarsiissut

Siunnersuummut 14. august 2019-meersoq taarsepaa
(*Siunnersuutip taaguutaata allangortinneqarnera kiisalu tamatuma kingunerisaanik
kalaallisoortaani aaqqiissuteqarneq*)

Siunnersuummut nassuiaatit

Nassuiaatit nalinginnaasut**1. Aallaqqaasiut**

Nukissiorfiit ullumi illoqarfinni nunaqarfinnilu atuisartunut innaallagiamik aamma ungasianiik kiassarnermik sunnuteqarluartumik naammattumillu pilersuinissamik pisussaaffeqarpoq. Nukissiorfiit taamaalilluni innaallagiamik kiassarnermillu inuiaqatigiinni kalaallini pingaaruteqarluinnartumik inissisimavoq. Inissisimaneq pingasunngorlugu agguagaasoq tassani pineqarpoq:


- Innaallagiamik aamma ungasianiik kiassarnermik tunisassiortoq pingaarneq, ilanngullugu sumi tamaginni atueruttulernerimi 100 %-imik naammattumik sillimmateqarnissamik pisussaaffeqarneq.
- Innaallagiamik aamma kiassarnermik ingerlaartitsinermut siammarterinermullu aqqusersuutitut piginnittuuneq ingerlatsisuunerlu.
- Innaallagiamik kiassarnermillu pilersuinerup teknikkikkut pitsaassuseqarneranut aamma innaallagiap oqimaaqatigiissinneqarneranut periaatsimut akisussaasuusoq, ilanngullugu ulluinnarni ingerlatsineq aserfallatsaaliuinerlu.

Tamatuma kingunerisaanik Nukissiorfiit sukkulluunniit illoqarfimmi imaluunniit nunaqarfimmi atuisartunut tamaginnut innaallagiamik kiassarnermillu pilersuisinnaasussaavoq. Ullumikkut nammineq tunisassiorfimmik ikkussuisoqarsinnaavoq, soorlu seqernup qinngornerinik tigooqqaaviit ilaalu ilanngullugu, inoqutigiinni imaluunniit illumi ukiup ingerlanerani piffissat ilaanni innaallagiamik kiassarnermillu imminut pilersornissamik ajornarunnaarsitsisumik. Tamatuma kingunerisaanik Nukissiorfiit isertitassanik annaasaqartarput, kisianni peqatigisaanik ulluni nammineerluni innaallagissiorfik uninngatillugu, innaallagiamik kiassarnermillu pilersuinissamut tamakkiisumik sillimmateqaannarnissamut pisussaaffeqarluni. Pingaartumik illoqarfinni erngup nukinganik innaallagissiorfeqartuni aningaasartuutit nikerartut annikitsuaraapput, taamaalilluni sullitanut imminut pilersortunut pilersuisinnaanissamut sipaaruteqarluni Nukissiorfiit misigisimanani. Nukissiorfiit aammalu inuiaqatigiit sinneri tamakkiisumik aningaasartuutitut aalajangersimasunut tamakkiisumik akiliisussanngortarput.

Namineerluni nukissiornerup annertunerulenera

Anorip aamma seqernup nukinga maannakkut pilersuinermi annikitsuinnaavoq, tassanngaanniillu tunisassiorneq taamaattumik nukissiamut naatsorsueqqissaarnerni pingaarnerni suli ilaatinneqarani. Kisianni innaallagissiorfinnit pisortat attaveqaataannut atassusigaasunit tunisassiornerup ilaa Nukissiorfiit ilisimasaqarfigaa. Tamatumunnga pissutaavoq innaallagissiorfinnik piginnittut nukissiamut atorneqanngitsumut, attaveqaatinut tuniniartagaannut, Nukissiorfinnit akiliummik tigusaqartarmata. Ilusiliaq 1-imi takuneqarsinnaasutut namineq tunisassiorneq taanna annertusiartorpoq.

Ilusiliaq 1. 2016-2018-imi seqernup qinngornerinik tigooqqaavinnit nukissiamik ataavartumik namminersortut tunisassiornerat



Namineq atugassamik kiisalu pisortat pilersuiffiit tunineqartussamik namineq tunisassiorneq annertusiartortoq, Ilusiliaq 1-imi takutinneqarpoq. 2016-ip naaneraniit 2017-ip naaneranut 48 %-inik qaffariartoqarnera misigineqarpoq, aammalu 2017-ip naaneraniit 2018-ip naaneranut 17 %-imik qaffariartoqarsimanera misigineqarluni. Qaffannerata annikinnerunera assigiimmik akeqartitsineri iluarsaaqqinnermik, Kalaallit Nunaat tamakkerlugu akigititanik appartitsisumik, pissuteqartoq ilimagineqarpoq. Taamaattoq akit appartinneqaraluartulluunniit 53 % tikillugu innaallagialersuinerit qaffariartornerat sumiiffiit ilaanni ingerlaannarmat maluginiagassaavoq.

GWh namminersortut innaallagissiorfiinit tunisassiarineqartut tamarmik, Nukissiorfiit kaaviiartitaannik 1,6 mio. koruuninik appartitsisarput. Sullitap namineq nukissiornerani, sullitaq Nukissiorfinnut qaammaqputinut nukissiamillu aningaasartuutinik sipaaruteqartarpoq. Illoqarfinni nunaqarfinnilu dieselitortunik motoorilinnit innaallagiamik tunisassiorfiusuni Nukissiorfiit ikummatissanut nunap iluaneersunut sipaaruteqarluni misigissavaa, illoqarfinni erngup nukinganik nukissiorfeqartuni sipaaruteqartoqartussaananani.

Seqernup qinngornerinik tigooqqaavinnit sunniuteqarnera qaffasissappat, dieselimik ingerlatilinni ajornartorsiortoqalertussaavoq, tassami innaallagissiorfiit motooriinut generatori taamaaqataanik ikummatissamut aningaasaqarneq pitsaanngitsuulluni aammalu sivikinnerusumik atorsinnaassuseqalerneranik kinguneqartumik atorneqannginnerulissammat. Illoqarfinnut dieselitortunik kissamik sinneruttumik atuiffiusunut seqernup qinngornerinik tigooqqaaviit kissamik sinneruttumik atuititsiunnaassapput, tamannalu tamatumunnga taarsiullugu uuliamik atuilluni kiassarnissamik pisariaqartitsilersitsisussaavoq, tamannalu Nukissiorfinnut aningaasartuuteqarnerulersitsissaaq. Taamaattumik namminersorlutik suliaqartut pisortat pilersuineranut attaveqaataannut killeqanngitsumik periarfissinneqarnerat Nukissiorfinnut aamma inuiaqatigiit aningaasaqarnerannut annertoorujussuarnik aningaasartuuteqartitsisussaavoq. Suliap ingerlanera aqunneqarpat, nukissiamik pisariaqartitsiviusuni aningaasaliisoqartarluni, ataavartumik nukissiorfinni allani inangiisoqannginnissaa qulakkeerneqassaaq, aammalu inuiaqatigiinni aningaasaliissutaasartut killeqartut attaveqatigiinnermi pioreersumi atorneqarnissaat qulakkeerneqassalluni.

Namminersortut atuinerannit, seqernup qinngornerinik tigooqqaavinnit imaluunniit inoqutigiinni anorisaatinik namminersortunit nammineq tunisassiarineqartunit 1 %-point-inut tamaginnut Nukissiorfiit kaaviiartitani 4,3 mio. koruuninik annaasaqartarput. 2018-imi Danmark-ip nukissiamik atuinerata 2,8 %-ia Energinet malillugu seqernup qinngornerinik tigooqqaavinneersuuvoq. Suliap ingerlanerannik aqutsinissaq qulakkeerneqanngippat, Kalaallit Nunaanni tamatumunnga assingusumik namminersortut atuutsitsilissasut naatsorsuutigineqartariaqarpoq. Teknologii akikinnerulertussaasoq sunniuteqarnerulertussaasorlu, suliassaqarfiup iluani teknologiikkut ineriartorneq tikkuussivoq, tamatumalu namminersortut atuinerulernissamik kajuminnerulersissavai.

Energinet malillugu 2018-imi Danmarkimi nukissiamik tunisassiornerup 41 %-ata missaa anorip nukinganeersuuvoq. Namminersortut aamma affaa pisortat aamma pisortat tunisassiorfii immikkoortinneqanngillat. Pisortat pilersuiffiinut tuniniaanissaq siunertaralugu aammalu nammineq atuinermuinnaanngitsoq, anorip nukinganik nukissiorfinnik ikkussuinissaq nalinginnaasumik annertunerusumik aallunneqarpoq. Kalaallit Nunaanni illoqarfinni erngup nukinganik tunisassiorfiusuni ataavartumik nukissiornermut akiliisitsinissamut akigititaqarnissaq periarfissaanngilaq. Illoqarfinni erngup nukinganik ingerlatsiviunngitsuni suliaqartut namminersortut nukissiorfinnik ikkussuisimasut, aammalu pisortat pilersuiffiinut nukissiamik pilersuineramik aallartitsisut, kWh-imut pilersuutigineqartumut ataatsimut 74 øre-mik akiliisitsisassapput. Assersuutigalugu anorisaammik 800 kW-imik ikkussinermi, ukiumut 40 %-imik sunniuteqarluartigisumik, taamaalilluni pisortat pilersuinerannit 2 mio. koruunit missaannik isertitaqartussaavoq. Nukissiorfiit sillimmateqartitsinissamik, siammarterivinnut aningaasaliinernut aamma ingerlatsinermut aningaasartuutitut akiliinissamik, attaveqaatinik patajaallisaanissamik, attaveqaatini annaasaqarnissamut, kiisalu namminersorlutik suliaqartut pilersuineranut attaveqaatini nukissiamik pilersuinerannut akiliinissamut pisussaaffilerneqassapput. Nukissiaq

pingaartumik kiassarnermut taarsiunneqassappat, Nukissiorfinni uuliamut aningaasartuutit sipaarneqartut taamaallaat 54 øre-nik annertussuseqassapput imaluunniit annikinnerussallutik. Nukissiorfiit aamma inuiaqatigiit taamaalillutik assersuusiarineqartumi kWh-mut ataatsimut atorneqartumut +20 øre missaanik, imaluunniit katillugit ukiumut 560.000 koruunit missaannik annertunerusumilluunniit annaasaqassapput.

Sumiiffinnut nunami namminermi erngup nukinganik nukissiorfeqareersunut imaluunniit allanik ataavartumik nukissiorfeqareersunut atatillugu namminersortut aningaasaliinerinik ingerlasoqassappat, inuiaqatigiit isigalugit nammineeeluni nukissiorfimmi aningaasaliinerit naleerutsisisussaapput. Nukissianut ataavartunut inuiaqatigiit aningaasaliineri, amerlanertigut inuiaqatigiinnut utertillugit qaffasissumik iluanaaruteqartitsisarput, nuna tamakkerlugu akigititat appasitsinniarlugit taperseeqatigiissitsinermut atorneqartartunik, tamatumalu illoqarfiit isorliunerusuniittut nunaqarfinnilu nunap iluaneersunik ikummatissanik atuilluni tunisassiorfiusartut, pingaartumik iluaqusertarpai. Illoqarfinni erngup nukinganik nukissiorfeqartuni namminersortut aningaasaliinerini taamaalilluni ikummatissat nunap iluaneersut taarserneqartussaangillat, kisianni nukissiorfiit ataavartut avatangiisinut mingutsitsinngitsut allat taamaallaat taarsertussaallugit. Taamaalilluni tamanna avatangiisinut iluaqusiisussaangilaq, kisianni taamaallaat namminersorluni suliaqartumut aningaasaqarnikkut iluanaarutaasussaalluni. Ilanngaaseereernerme sunniutaasusaaq tassaavoq, inuiaqatigiit isertitassanik, siunissami ikummatissat nunap iluaniittut atorneerutsillugit nukissiornermut ataavartumut siunissami aningaasaliissutissatut immikkoortinneqartunik, annaasaqarnerat.

Naggasiutigalugu inuiaqatigiinni annertunerusumik aningaasaliinissamut taarsiullugu, pilersitsiviusussat mikisut amerlasuujuppata, tamanna inuiaqatigiit aningaasaqarnerannut imminut akilersinnaangitsoq, paasissallugu pingaaruteqarpoq, tassami siulliullugu taaneqartumi suliniutinut aningaasaliinerni, innaallagialersuinerni ingerlatsinernilu angisuunik ingerlatsinermi iluaqutissartaasut annertoorujussuusussaammata. Inuiaqatigiit isigalugit, pisortat aamma namminersortut atuilersinnissaannut, pisuni tamaginni inuiaqatigiit aningaasaqarnerannut iluaqutaasumik, ingerlasussamut, piumasaqaatinut killissaliussanik pitsaasunik pilersitsisoqarnissaa kissaatiginarpoq.

Naatsorsuusereriaatsimi allannguutit

Namminersorlutik Oqartussani naatsorsuusereriaatsimik nutaamik atuutsitsisoqalerpoq, Nukissiorfiit politikikkut akigititanik iluarsiarneq malittussaallugu pisortat pilersuinermut suliffeqarfigigaat eqqarsaatigalugu, danskit ukiumoortumik naatsorsuutitut inatsisaat malillugu naatsorsuutitut saqummiussisarnissamut Nukissiorfinnut pisussaaffiliisunik, ilanngullugit suliffeqarfiit naatsorsuutit C-mi inissisimasunut aalajangersakkat. Ukiumoortumik naatsorsuutitut inatsimmi ”Namminersornerullutik Oqartussat suliffeqarfiutaasa namminersortitat naatsorsuuseriveqarnerat il.il. pillugit Namminersornerullutik Oqartussat nalunaarutaat nr. 25, 26. november 1998-imeersumut”

maannamut atuuttumut sanilliullugu pigisat nalilerneqartarnerannut piunasaqaatit sukannernerusut piunasaqaatigineqarput.

Taamaattumik suliffeqarfiup pigisai, pigisap naatsorsuutini allassimanageratut suli naleqarnerisooq, ukiut tamaasa misissortarnissaanut Nukissiorfiit pisussaaffilerneqarput. Nukissiorfiit amigartooruteqarsimappata, tamanna isumaqarpoq pigisat ilai amigartooruteqarfiusut, taakkualu nalikillilerneqartussaassasut

- 1) pisiareqqinnerani nalinganut,
- 2) pigisap aningaasaqarnikkut oqimaatigiiffiulernissaata tungaanut, imaluunniit tamanna ajornarsimappat
- 3) 0-nngorlugu nalikillilerneqarluni.

Tamanna 2018-imi piviusunngoreersimavoq, tassani Nukissiorfiit pigisaminnik aammalu nammineq aningaasaatinik 1,6 mia. koruuninik nalikillilerilluni. Nukissiorfiit aningaasaqarnerat annertunerusumik tatisimaneqalissappat, suliffeqarfik taamaallaat sullitanut sillimmatinut pisinnaasanik attassilerluni, kisianni tunisassiornerminit isertitaqarunnaarluni, suliffeqarfiup nammineq aningaasaatai annikillisussanngussapput, taamaalilluni Nukissiorfiit ingerlatsinermit imaluunniit allatigut aningaasaatinut akiliuteqarluni Nunap karsianit ikiorneqanngikkuni, ingerlatseqatigiiffittut ingerlaannarsinnaanera navianartorsiortinneqalersinnaalluni.

2. Siunnersuummi immikkoortut pingaernerit

Siunnersuummi siunertaavoq, ajornerpaamik pisoqarpat suliffeqarfiup aningaasaqarnikkut akiliisinnaassuseerunneranik, aammalu Kalaallit Nunaanni innaallagiamik kiassarnermillu pilersuisinnaanissaata ingerlaannarnissaanut Nunap karsianit ikiorneqarnissamik pisariaqartitsilerneranik malitseqartumik, Nukissiorfiit pisussaaffeqalersinneqannginnissaata qulakkeerneqarnissaa.

Siunnersuutip malitsigisaanik akuttunngitsumik Nukissiorfiit pilersuisussaataitaneranut isummertoqartassaaq. Tamanna sullissinissamut isumaqatigiissummi aalajangersarneqassaaq, ataatsimut isigalugu ingerlatsinermit annaasaqarnermik malitseqartussamik, aallaaviatigut Nukissiorfiit pisussaaffeqalersinneqartassanani, tassami tamatuma malitsigisaanik inuiaqatigiit aningaasaqarneranni amigartoorfiusumik nalikilliliinerit arlallit suliarineqartassapput.

Taamaattumik siunnersuummi allassimavoq, sunniuteqarluartumik pilersuinerup attatiinnarnissaanut, ataatsimut isigalugu ingerlatsinermit amigartooruteqarnermik malitseqartumut, tunngatillugu, pisussaaffinnik aalajangersaasoqarsimappat, tamanna sullissinissamut isumaqatigiissut naapertorlugu akiliinikkut matussuserneqartassasoq. Pisussaaffik pineqartoq akigititanut akinullu Inatsisartut peqqussutaanni kapitali 6 naapertorlugu Naalackersuisunit akuerineqarsimasunut, sanilliullugu nalilersorneqassaaq.

| Inatsisissatut siunnersuut inatsimmut atuuttumut sanilliullugu | |
|--|--|
| <i>Oqaasertaliineq atuuttoq</i> | <i>Inatsisissatut siunnersuut</i> |
| | § 1 Nukissamik pilersuineq pillugu Inatsisartut peqqussutaat nr. 14, 6. november 1997-imeersumi, Inatsisartut peqqussutaanni nr. 9, 15. november 2007-imeersumi aamma Inatsisartut inatsisaanni nr. 41, 23. november 2017-imeersumi allanngortinneqartumi, makkua allanngortinneqarput: |
| <p>§ 12. Nukissiorfiit illoqarfinni nunaqarfinnilu pitsaasumik naammattumillu innaallagissamik kiammillu pilersuinissaminnut pisussaataapput. Suliffeqarfiit nukissamik pilersuisuusut allat innaallagissamik kiammilluuniit sumiiffimmi atuisunut, inissianut suliffeqarfimmulluuniit assigisaannullu pilersuisuusut atuisuminut pilersuisussaannermik assinganik pisussaaffeqarput.</p> <p><i>Imm. 2.</i> Pilersuiffiusup pissutsit qanoq ilinerini annertusineqarnissaa, kiisalu tamatumunnga aningaasartuutit matussuserneqarnissaat pillugit Naalakkersuisut piumasaqaasiortassapput.</p> <p><i>Imm. 3.</i> Nukissiorfiit qinnuigineqarnermikkut pilersuiffiusut avataanni innaallagissamik pilersuinermut atortuliigallarsinnaapput, kommuni atuisulluuniit pineqartut tamatumunnga aningaasartuutunik matussuseeqqataappata.</p> | <p>1. § 12 imatut oqaasertalerneqarpoq: “ § 12. Nukissiorfiit illoqarfinni nunaqarfinnilu sunniuteqarluartumik naammattumillu atuisartunut innaallagiamik aamma ungasianiik kiassarnermik pilersuinissamik Naalakkersuisunit pisussaaffilerneqarsinnaapput. Nukissiamik pilersuinermik suliaqartut allat, sumiiffimmi, inissiaateqarfimmi imaluunniit sullissivimmut ilaalu ilanngullugit innaallagiamik imaluunniit kiassarnermik pilersuisut, taamaaqataanik atuisartuminnut pilersuinissamik pisussaaffilerneqarsinnaapput.</p> <p><i>Imm. 2.</i> Pilersuiffiususaaq qanoq pisoqarnerani allilerneqassanersoq, kiisalu tamatumunnga aningaasartuutitut matussusiinissaq pillugu piumasaqaatinik Naalakkersuisut aalajangersaassapput.</p> <p><i>Imm. 3.</i> Nukissiorfiit piumaffigineqarnerminni pilersuiffiusut avataanni innaallagissamik pilersuinermut atortuliigallarsinnaapput, kiisalu piumaffiginnittup aningaasartuutitut matussuseeqataaneratigut pilersuinermut</p> |

| | |
|--|---|
| | <p>attaveqatigiinnerni pioreersuni allanngortitsisinnaallutik.</p> <p><i>Imm. 4. Imm. 1 malillugu pisussaaffeqarneq sullissinissamut isumaqatigiisummi aalajangersarneqassaaq, tassani taamatuttaaq Nukissiorfiit ataatsimut isigalugu ingerlatsinermi amigartooruteqartussaappata, akiliinissaq pillugu atugassarititaasut aalajangersarneqassallutik. Ingerlatsinermi amigartoorutinut illuatungiliisussamik akiliinissaq pillugu isumaqatigiissuteqartoqarsimangippat, Nukissiorfiit sullissinerup annertussusaa imaluunniit akigititat aamma pilersuinermut piunasaqaatit allanngortissinnaavai, taamaalillutik Nukissiorfiit ingerlatsinermi angusaat ataatsimut isigalugu amigartoorfiussanatik.”</i></p> |
| <p>3) Naalaagaaffimmi oqartussaasut imaluunniit ingerlatsiveqarfiit, suliffeqarfiit, il.il. Namminersornerullutik Oqartussat ataanniittut.</p> | <p>2. § 24, imm. 3, nr. 3, imatut oqaasertalerneqarpoq:</p> <p>” 3) Naalagaaffimmi oqartussat imaluunniit sullissiviit, suliffeqarfiit il.il. Namminersorlutik Oqartussat ataanniittut.”</p> |
| | <p>3. § 24-imi imm. 4-itut ikkunneqarpoq:</p> <p>” <i>Imm. 4. Akiliisitsinerit Nunap karsianut tutsinneqassapput.”</i></p> |
| | <p style="text-align: center;">§ 2</p> <p>Inatsisartut inatsisaat atuutilerpoq 1. januar 2020.</p> |

3. Pisortanut aningaassaqaarnikkut allaffissornikkullu sunniutaasussat

Siunnersuummi siunertaavoq Nukissiorfiit minnerpaamik ”imminut nammattumik” suliffeqarfittut ingerlatsinerminik attassisinnaanissaata qulakkeerneqarnissaa. Pisussaaffiit

pisussaaffiliunneqartut ataatsimut isigalugit Nukissiorfiit amigartooruteqarnerannik malitseqarsimappata, Nukissiorfinnut annertunerusumik akiliuteqartoqartassasoq, siunnersuutip malitsigisinnaavaa.

Nukissiorfiit assersuutigalugu inoqarfimmi ataatsimi pilersorneqanngikkaluartumi pilersuinermit pilersitsinissamik pisussaaffilerneqarpat, ingerlatseqatigiiffik sanaartornermut aningaasaliinernut aningaasartuuteqarnissamik, imermik pilersuinermit aamma innaallagiamik pilersuinermit 20-35 mio. akornanniikkajuttunik, kiisalu tamatuma kingorna akit ilusiligaanerannit matussuserneqanngitsunik ingerlatsinermit ingerlaavartumik aningaasartuuteqarnissamut, pisussaaffilerneqassaaq. Sanaartornermut aningaasaliinernut aningaasartuutit aamma ingerlaavartumik ingerlatsinermit aningaasartuutit taakkua, akigititanik qaffaanissaq kissaatigineqanngippat, Nunap karsia aqutigalugu aningaasalersorneqartussanngussapput.

4. Inuussutissarsiortunut aningaasaqarnikkut allaffissornikkullu sunniutaasussat
Siunnersuut inuussutissarsiortunut annertuunik sunniuteqassagatinneqanngilaq.

5. Avatangiisinut, pinngortitamut inuillu peqqissusaannut sunniutaasussat
Siunnersuut avatangiisinut, pinngortitamut imaluunniit inuit peqqissusaannut sunniuteqassanngilaq.

6. Innuttaasunut sunniutaasussat

Nukissiorfiit taamaanngippat ataatsimut isigalugu ingerlatsinermit amigartooruteqartussaasimappat, pilersuinermit akigititanilu allanngortitsisoqarsinnaassappat, siunnersuut innuttaasunut sunniuteqarsinnaassaaq. Pilersuinerup allanngortinneqarnera assersuutigalugu tassaasinnaavoq, sumiiffimmi pineqartumi sulisussanik atorfinitsitsinani, ungasianiit alapernaarsuinerlammik aammalu nunap immikkoortuani illoqarfimmit pingaarnermi unittoornermit ikiorsiinerlammik inuttaqanngitsumit pilersuilluni sullissinerup annikillisinneqarnera. Akigititani allanngortitsineq, Nukissiorfiit assersuutigalugu 20 mio. koruuninik nammagassinneqarnera aallaavigalugu, ataatsimut katillugu akigititat tamarmik 3%-imik qaffanneqarnerannik malitseqassaaq.

7. Sunniutaasussat annertuut allat

Siunnersuut allanik annertuunik sunniuteqassanngilaq.

8. Oqartussanut kattuffinnullu il.il. tusarniaaneq

Siunnersuut piffissami 23. maj 2019 - 27. juni 2019 Naalakkersuisut tusarniaanermut nittartagaanni tusarniaassutigineqarpoq:

Siunnersuut taamatuttaaq piffissami tassani Nukissiorfinnut tusarniaassutigalugu

saqqummiunneqarpoq.

Nukissiorfinniit aamma Kommune Kujallermit tusarniaanermut akissuteqaatit tiguneqarput.

Tulliuttuni tusarniaanermut akissuteqaatit tiguneqartut sammineqarput. Oqaatigineqassaaq tusarniaanermut akissuteqaatit uingasumik allassimammata, aammalu tusarniaanermut akissuteqaatit pingaaruteqassusaannik nalilersuineq tunngavigalugu pingaarnertigut issuarneqarlutik.

Nukissiorfiit siunnersuummut oqaaseqaatissaqanngilaq.

Kommune Kujalliup oqaatigaa, amigartoorutaasut kiffartuussinissamut isumaqatigiissut aqqutigalugu matussuserneqanngippata kommunit pisortanit ikiorsiissutinut aningaasartuuteqarnerulersinnaanera, siunnersuutip malitsigisinnaagaa. Nukissiorfiit ingerlatsinermi amigartooruteqannginnissaannik qulakkeerisumik sapinngisamik tamatigut kiffartuussinissamut isumaqatigiissuteqartoqariaqaraluartoq, ataatsimut isigalugu Kommune Kujalliup inassutigaa.

Tusarniaanermut akissuteqaatit siunnersuummi allangortitsinissamik pissutissaqalersitsinngillat.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

§ 12, imm. 1-imut

Aalajangersakkami allassimavoq Naalakkersuisut Nukissiorfiit innaallagiamik aamma ungasianiit kiassarermik sunniuteqarluartumik naammattumillu pilersuinissamik pisussaaffilersinnaagaat. Pilersuisut allat taamaaqataanik pisussaaffilerneqarsinnaapput. Taamaalilluni aalajangersakkap malitsigisaanik Nukissiorfiit pilersuisussaataitanerata annertussusissaanut Naalakkersuisut isummissapput aammalu taassuma annertussusaa § 12, imm. 4 naapertorlugu sullissinissamut isumaqatigiisummi aalajangersarneqassaaq.

§ 12, imm. 2-imut

Aalajangersakkap maannakkut § 12, imm. 2 atuuttoq assingaa. Aalajangersakkap allanngortinneqarnera siunertarineqanngilaq. Sumiiffik pilersuiffiusoq annertusitinneqassasoq, kiisalu tamatumunnga aningaasartuutit matussuserneqarnissaat, Naalakkersuisut taamaalillutik aalajangersinnaavaat. Naalakkersuisut peqatigisaanik Nukissiorfiit sumiiffinnut nutaanut sunniuteqarluartumik pilersuinissamut pisussaaffilersimappasigit, tamanna § 12, imm. 4 malillugu sullissinissamut isumaqatigiisummi ilanngunneqartussaassaaq.

§ 12, imm. 3-imut

Aalajangersakkap maannakkut § 12, imm. 3 atuuttoq assingaa. Aalajangersakkap allanngortinneqarnera siunertarineqanngilaq. Taanna malillugu Nukissiorfiit piumaffigineqarnermini, kommunip imaluunniit tamatuminnga piumaffiginnittup, tamatumunnga aningaasartuutit matussuseeqataaneratigut, sumiiffimmi nalinginnaasumik pilersuiffiunngitsumi innaallagiamik pilersuiffiugallartussamik pilersitsisinnaavoq. Taanna aamma taaneqartarpoq ”pineranut pissutaasumut tunngaviusoq”, tamatuma kingunerisaanik attaveqatigiinnerup pisortanit pilersinneqareersimasup allanngortinneqarnera kissaatigineqarpat, pineranut pissutaatitsisup aningaasartuutit matussusissagai pillugu nalinginnaasumik tunngaviusoq atorneqartussaalluni.

§ 12, imm. 4-imut

Aalajangersagaq nutaajuvoq. Aalajangersagaq naatsorsuusereriaatsimut inatsimullu nutaamut ataqatigiisillugu atuarneqassaaq, taanna malillugu ukiumi angusanut sanilliullugu isigalugu, suliffeqarfiup ataatsimut isigalugu ingerlatsinermi amigartooruteqalerneranik malitseqartumik Nukissiorfiit pisussaaffilerneqannginnissaa, pingaaruteqarluinnarpoq.

Aalajangersakkami aalajangersarneqarpoq Nukissiorfiit pilersuinissamut pisussaaffeqarnera sullissinissamut isumaqatigiissummi aalajangersarneqassasoq, § 12, imm. 1 naapertorlugu pisussaaffiit pisussaaffiliunneqartut, Nukissiorfiit ataatsimut isigalugu amigartooruteqalernerannik malitseqassappata, Nukissiorfiit qanoq annertutigisumik akiliiffiqineqassanersut, tassani peqatigisaanik isummerfigineqassalluni.

Aalajangersakkami peqatigisaanik aalajangersarneqarpoq, akiliinissaq Nukissiorfiit ingerlatsinermi amigartooruteqarneranik illuatungiliisussa q isumaqatigiissutigineqarsimangippat, Nukissiorfiit nammineq iliuseqarnermini sullissinerminik akigititanillu allanngortitsisinnaassasoq, taamaalilluni Nukissiorfiit ingerlatsinermi amigartooruteqannginnissaa qulakkeerneqassalluni.

Nr. 2-imut

Namminersorlutik Oqartussat atuutsinneqalersimanerisa malitsigisaanik, aalajangersagaq teknikkikkut iluarsineruvoq.

Nr. 3-imut

Akiliisitsinerit pineqaatissiissutigineqartut Nunap karsianut tutsinneqartarnissaat, aalajangersakkami qulakkeerneqarpoq.

§ 2-imut

Siunnersuutigineqarpoq Inatsisartut inatsisaat ulloq 1. januar 2020 atuutilissasoq.